

## 『上宮聖德法王帝説』

伊波禮池邊雙槻宮治天下橘豊日天皇。娶庶妹穴穗部間人王爲大后。生兒。厩戸豊聰耳聖德法王。

次久米王。次殖栗王。次茨田王。

又天皇。娶蘇我伊奈米宿禰大臣女子名伊志支那郎女。生兒。多米王。

又天皇。娶葛木當麻倉首名比里古女子伊比古郎女。生兒。乎麻呂古王。次須加氏古女王〈此王拜祭伊勢神前至于三天皇也。〉合聖王兄弟王子也。

（中略）

少治田宮御宇天皇之世。上宮厩戸豊聰耳命。嶋大臣共輔天下政而興隆三寶。起元興四天王等寺。制爵十二級。大德。少德。大仁。少仁。大禮。少禮。大信。少信。大義。少義。大智。少智。

池邊天后穴太部間人王。出於厩戸之時。忽產生上宮王。王命幼少聰敏有智。至長大之時。一時聞八人之白言而辦其理。又聞一知八。故號曰厩戸豊聰八耳命。池邊天皇。其太子聖德王。甚愛念之。令住宮南上大殿。故號上宮王也。

上宮王師高麗**慧慈**法師。王命〈ラク〉能悟涅槃常住五種佛性之理。明開法華三車權實二智之趣。通達維摩不思議解脫之宗。且知經部薩婆多兩家之辨。亦知三玄五經之旨。竝照天文地理之道。卽造法華等經疏七卷。號曰上宮御製疏。太子所問之義。師有所不通。太子夜夢見金人來教不解之義。太子寤後卽解之。乃以傳於師。師亦領解。如是之事非一二耳。

太子起七寺。四天王寺。法隆寺。中宮寺。橘寺。蜂丘寺〈并彼宮賜川勝秦公。〉池後寺。葛木寺〈賜葛木臣。〉

（下略）